

Date – 13/06/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Mizorama a pawl anga a thlawna thisen pe tha ber chu NSS Mizoram a ni a, Central KTP in an dawt a, Mizoram TKP pathumna an ni.
2. Rampum huapa loneitute zirtirna hun, Viksit Krishi Sankalp Abhiyan (VKSA) hnuaiah Aizawl district chhungah loneitu 8889 te zirtir an a ni.
3. Prime Minister Narendra Modia chuan vawiin khan Air India chetsualna hmun Ahmedabad a tlawh.
4. Israel chuan nizan khan Iran a kap.



WORLD BLOOD DONOR DAY

Mizorama a pawl anga a thlawna thisen pe tha ber chu National Service Scheme (NSS) Mizoram a ni a, Central KTP in an dawt a, Mizoram TKP pathumna an ni.

Vawiina Mizoram State Aids Control Society (MSACS) leh Association for Voluntary Blood Donation (AVBD) buatsaiha khawvel huapa a thlawna thisen pek inzirtirna Ni, World Blood Donor Day puala Aizawl Dawrpui Multipurpose Centre-a hun buatsaihah lawmman hi sem a ni a, vawiina thisen pe tha lawmman dawngtute chu Religious Category-ah Central Kristian Thalai Pawl, Institutional Category (College) ah Govt. Aizawl College NSS unit, Institutional Category (Higher Secondary School) ah Synod Higher Secondary School NSS Unit an ni a, Tlawmngai pawl category-ah Seling Branch YMA leh Miscellaneous category-ah Mizoram Gurkha Youth Association te an ni.

Vawiin World Blood Donor Day puala hun hmanah hian thisen pe tha te lawmman hlan anih bakah Zirlai kalkhawm ten thisen pe turin thu an tiam bawk a ni.

SFX (pledge)

He hun hmanpuitu Land Revenue & Settlement Minister Pu B. Lalchhanzova chuan thusawiin ruihhloin a tihbuai fa nei, nu leh pa, an fate home a dah kher lo a, mahniah manganpuia, mualpho pui ngam, khawiah emaw an harsatna ben per zel tum lo ramin a mamawh tih sawiin Minister chuan an thatlai hun berah ruihhlo hnawl ngam a, dam rei tura taksa vawn that a pawimawh thu a sawi. A thlawna thisen pe thin te

chu an thiltih a lar loa a lan pawhin ram pumin a hria a, Pathianin a hriatpui a ni tih sawiin a thlawna thisen pek chu dawngtute tan pawh thil lawmawm tak a ni a ti.

Lawngtlaiah YLA Golden Jubilee Hall ah World Blood Donor Day hi hman a ni a, he hunah hian Lawngtlai District Hospital Blood Bank tarlan danin, kum kalta 2024 June Ni 14 atanga kumin 2025 May Ni 31 thleng khan Lawngtlai District ah Blood Donation Camp vawi 46 neih ani a, thisen Unit 1148 niin, Voluntary a thisen dawn zat hi Unit 1217 a ni bawk. Heng thisen dawn te hi Lawngtlai a Damdawiin pathum ah pek chhuah a ni.

Vawiin khan Kolasib Electric Veng Br YMA member te chuan a mamawh apiangte hman atan Kolasib District Hospital Blood Bank-a dah tur in thisen Unit 10 an pe a, thisen petute hi mipa 8 leh hmeichhia 2 anni.

Kumina World Blood Donor Day hian thupuih 'thisen pe la, beiseina siam rawh, tangrualin nunna kan chhan thei' tih, "Give Blood, give hope: together we save lives" tih hman a ni a. MSACS tarlan danin nikum tangka kum chhung khan thisen unit 34,752 pek niin heta zaa 93.71, unit 32,566 chu a thlawna pek a nih thu an tarlang a. Kumin tangka kum kal mekah April atanga May thla chhung khan thisen Unit 5,713 pek tawh niin heta zaa 90.11, unit 5,148 chu a thlawna pek a ni a. Blood Donation Camp 90 buatsaih a ni tawh bawk a ni.

Corr: Ruata



VKSA

Thla hmasa ni 29 atanga ram pum huapa loneitute zirtirna hun hman, Viksit Krishi Sankalp Abhiyan (VKSA) hnuaiah Aizawl district chhungah loneitu 8889 te zirtir hna thawh hman a ni.

Akashvani zawhna chhangin KVK Aizawl hotute chuan Aizawl district chhunga VKSA kalpuiah hian rural development block 3 chhunga khaw 87 tuamchhuah hman a nih thu leh, hetah hian loneitu mi 8,889 te zirtir hna an thawh hman thu an sawi a. Thla hmasa ni 29 atanga tan, Viksit Krishi Sankalp Abhiyan campaign hman chhung khan KVK Aizawl, ICAR Kolasib, CVSc&AH leh sorkar department thenkhata mithiamte telna expert team pathum chuan nitin khaw pakua an tlawh a. Heng expert team te hian loneitute zirtir mai bakah inkawmhona hun te an hman pui a, loneitute thusawi atangin hmasawinna hna thawh zel na tura tangkai te an chhinchhiah bawk a ni.

VC Vanlalruata

Sorkar laipuiin loneitute tihchakna tur campaign pawimawh tak mai, Viksit Krishi Sankalp Abhiyan a kalpuiah hian mithiamten kawng hrang hrangin loneitute hlawk zawk leh awmze nei lehzuala lo an neih theih dan tur an zirtir a. Thupui hrang hrang hmanin zirtirna an kalpui a, lo neihna tura a leilung lo buatsaih dan tur Land Preparation te, thlai chi tuh kawnga hriat tur pawimawh leh lei tha hman dan dik Crop Production And Management te, tui dahkhawl dan tha zawk Water Resources Management te, an loa lei tih hrisel dan leh thlai thar tam thei tura a lei buatsaih dan Soil Health And Nutrient Management te, daih rei leh hlo hlauhawm tello a lo neih dan Sustainable And Organic Farming te zirtir an ni a. Heng bakah hian tunlai thiamna hmanraw hrang hrang hman tangkai dan te, ran vulh dan hlawk zawk

thlengin an zirtir bawk a. Loneitute pawhin an hlawkpui hlein mithiamte chuan an hria a ni.
Vanlalruata, Akashvani News Aizawl

(Corr)



CONG

Mizoram Pradesh Congress Committee (MPCC) Sr. Vice President Pu Lalnunmawia Chuaungo chuan ZPM in an sorkar tirha thlai thar leina tur cheng vbch 110 an dah atangin cheng khat pawh kut hnathawktute thlai thar lei nan an hmang lo a ti.

Vawiina an party pisaa Friday political session an hmanah he thu hi sawiin Pu Lalnunmawia chuan ZPM sorkar kum a liam hnuah cheng vbch 110 an dah atangin cheng khat pawh kut hnathawktute thlai thar lei nan hman a nih loh thu leh, lei tura tutu emaw an rawih te chuan cheng nuai 10 dawn hmangin kuthnathawktute kutah engmah a lut lo a ti.

Kumin hmunphiah lei hun ah sorkarin a leitu tur empanelled firm pariat an dah tih sawiin chung zinga panga chauh chuan hmunphiah an lei a ti a. Grade A Rs 100/- in an lei tur thu leh Grade B Rs 80 in an leisak tur thu an sawi pawh an tiam angin an leisak leh chuang lo a, Hmunphiah qtl 10900 vel awrh an leisak tih sawiin an leisakna tam ber chu Rs 80/- tling lo in a ni a ti.

Sawhthing pawh sorkar document a a landan chuan chhungkua 25327 in acre 405.50 velah sawhthing an ling tih sawiin Pu Lalnunmawia Chuaungo chuan a chi a an lin zat chu qntl 1,69,395 a ni a. Mizoram a sawhthing thar tur chu qntl 1483253 niin sorkar a chhut tih sawiin June thla thleng lei an tum laiin May ni 20 ah pawh quintal nuai khat an lei tlin awrh chauh thu a sawi a ni.

Pu Lalnunmawia chuan sorkarin Healthcare an kalpui mek pawh PMJAY behchhanin an siam a, ruahmanna an siam reng reng chu ziktluak a awm ngai lo thu a sawi a. Thlai thar lei ruahmanna pawh a ziktluak lo tih sawiin healthcare pawh zia-ah chuan a tha ang a, mahse, a ziktluak lo a ni a ti.

(PR)



YUVIKA

Indian Space Research Organisation buatsaih Young Scientist Programme (YUVIKA) 2025 thla liamtaa Shillong khawpuia buatsaih ah zirlai sing 9 chuang dilna lut zingah Lalremruata Renthlei, Thenzawl khua PM SHRI Jawahar Navodaya Vidyalaya, Thenzawl-a pawl 9 zirlai chu thlan a ni.

Lalremruata Renthlei hi Pu Liantluanga Renthlei fapa niin Thenzawl ah an cheng mek a, YUVIKA 2025 tel tura thlan mi 350 zingah telin Mizoram atanga kal 8 zinga Mizo awmchhun a ni.

Lalremruata Renthlei chuan YUVIKA 2025 chu a hlawkpui thu sawiin van thengreng chanchin leh India hmasawna hrang hrang a takin an hmu thei a ti a, mithiam tak tak kamchhuak hriat tur a awm bakah zirlai dang te nen hlawk thlak takin hun an hman thu a sawi.

Shillong khawpuia North Eastern Space Applications Centre (NE-SAC)-a May ni 19 atanga ni 30 inkara neih YUVIKA 2025 ah hian science thiamna chi hrang hrang bakah van thengreng chanchin leh tunlai thiamna hman tangkai dan hrang hrang te zirtir an ni a, mithiam tak tak ten zirlai te hmasawna tur hrang hrang an sawi a ni.

YUVIKA 2025 ah hian Rohini 200 rocket kah chhuah chu Live a en ho a ni a, vansang lama India tana fehchhuak thin Angad Prathap hnen atangin thu pawimawh hrang hrang ngaihthlak niin zirlaite hian Guwahati Planetarium bakah sipai hmunpui Eastern Air Command te pawh an tlawh bawh a ni.

(Desk)

<><><>

CYMA

Central YMA chuan YMA Day vawi 90-na pualin Damdawi In leh Home hrang hrangah thilpek a sem a. Mizorama pawna Mizo Welfare thenkhatah a hlan bawh.

Kumtina tih thin angin Central YMA chuan India ram khawpui hrang hranga Mizo Welfare 17 hnenah YMA Day chibai bukna Rs.15,000/- theuh a pe a, Aizawl khawpui chhunga Sawrkar leh Kohhran Damdawi In 6 ah Rs.15,000/- theuh a hlan bawh.

Nimin khan Tawngtai Bethel Camping Centre (TBCC), OKM Home leh Thutak Nunpuitu Team (TNT) ah te buhfai bag 50 theuh an hlan a, Central YMA chuan kumin YMA Day hi Pathianni a nih avangin Sub- Hqrs, Group leh Branch YMA te chu mahni remchan angin Inrinni emaw Thawhtanni emaw a hman mai turin hriattirna a ti chhuak a. Hmun hrang hranga YMA Day hman pui turin Central YMA hruaitute leh Sub- Hqrs hruaitute pawh an zin chhuak dawn a ni.

Central YMA thuchhuah tarlan danin YMA Day vawi 90-na hlim tak leh tluang taka hman turin YMA member zawng zawngte duhsakna a hlan a. YMA chu tlawmngai pawl, tanpui ngaite tanpuitu a nih angin YMA Day ah mahni huamchung theuhvah chanhai, riangvai tanpui ngaite tanpui a, midang tana ke pen chhuak turin Sub- Hqrs, Group leh Branch YMA te a ngen tih a sawi.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Air India chetsualna hmun Ahmedabad a tlawh. Pu Modia hian Ahemdabad Civil Hospital tlahwin Air India thlawhna chesual avanga hliam tuarte a tlawh a. Pu Modia chuan Ahmedabad-a chhiatna rapthlak thleng hian rampum a nghawng thu social media ah a tarlang a ni. Prime Minister Modia hian hain thlawhna chesuala chuang zinga damchhuak awmchhun Vishwash Kumar Ramesh chu a hmu bawk a. Pu Ramesh-a damdawiinah enkawl mek a ni.

Vawiin vek khan Prime Minister hian thlawhna tlakna hmunte a nkual a. Hemi hnu hian Ahmedabad ah review meeting a nei nghal a. Hei bakah hian thlawhna chesuala thi Gujarat Chief minister hlui Vijay Rupani chhungte a tlawh bawk a ni. Kan Correspondent sawidanin thlawhna chesuala thi te ruang hi post mortem anih hnuah an chhungte hnenah hlan zel a ni a. Civil Hospital Superitendent chuan hliam mi 32 an enkawl mek thu a sawi a ni.

Puan tawh angina nimin chawhnu khan Ahmedabad atanga London pana thlawk chhuak Air India thlawhna chesualin a chhunga chuang mi 242 zinga 241 an thi a ni.

(Newsonair)

<><><>

EAM

External Affairs Minister Dr.S.Jaishankar chuan UK Foreign Secretary David Lammy, Portugal Foreign Minister Paula Rangel leh Canada Foreign Minister Anita Anand te nen Ahmedabad-a thlawhna chesual chungchangah an inbiak pawh reng thu a sawi. Dr. Jaishankar-a chuan vanduaiana tawkte an tawrhpu thu a sawi a. Air India thlawhna chesualah hian British mi 53, Portuguese mi 7 leh Canadian 1 he chetsualnaah hian an thi a ni.

(Newsonair)

<><><>

ISRAEL

Israel chuan nizan khan Iran a kap thut. Israel Prime Minister Benjamin Netanyahu chuan nuclear programme leh sipai hotute an bitum tih sawiin ni engemawzat chu an kap dawn tih a sawi a. He inkahna avang hian Asia khawthlang lam dinhmun a derthawng thar leh hle a. Nizana sipai an kahhlum zingah hian Iran sipai Commander in chief General Hossein Salami pawh a tel a ni.

(Newsonair)

<><><>